




*Senin, 23 Nopember 2020*

**Ogen: Matius 10: 28-31**



**Aru Ate Olangi Kemajun**



**S**ituasi asum Jesus ngajar, e kepulungen jelma enterem kal, seh meribu-ribu kalak, enggo rincet-incet ia kerina. Perlebe ngerana Jesus man ajar-ajarNa nina "Metengetlah kam nandangi ragi kalak Parisi, eme biakna si pekulah-kulah." Lain kata si ibelaskenna lain si ilakokenna. Tempa ia kalak bujur, saleh, pentar tapi situhuna taki pacik lit i bas ia. Pekulah-kulah ertoto i bas jelma si enterem gelah teridah tempa ia kalak bujur tapi si tuhuna pertotonna e terjeng bas biber ngenca. Iterusken Jesus ka tole alu ngatakenca: "Ola kam mbiar nandangi kalak si ngasup munuh badan, tapi mbiarlah man Dibata." Ertina manusia tuhu banci munuh temanna manusia, tapi la ngasup mereken kegeluhen. Dibata ngasup pegeluhken kalak si enggo mate, janah IA ngenca ngasup mereken kegeluhen si rasa lalap. Ndauh belinen Kuasa Dibata asa pemeteh manusia, jadi kai gunana kam mbiar man manusia? Tek dengen ernalem kempak Tuhan, sebab IA kap si madasa dengen si ngaturkenca kegeluhenta enda. Perik cip-cip pe meherga iakap Bapa si i surga. Buk takal ta pe enggo ibeligaiNa. Em perhatinNa man banta manusia, janah enda nuduhken bage me ergana kita i lebe-lebena.

Arah Kata Tuhan Jesus e iajarina kita gelah ola eraru ate. Biasana aru ate e nandangi kai si lenga siidah, umpamana uga pagi masa depan anakku e adi ia enggo mbelin, anakta ndai umurna 3 tahun denga. Lit bedana ras mbiar, sabap adi mbiar buiasana man si idah kita, si gegehen ia asangken kita, umpamana mbiar kita man biang sebab banci ikaratna, turah pinakit bas kula. Nina Jesus ula mbiar sabap gegehen IA asa kerina si nasa lit I doni enda, si ngasup mereken kegeluhen si rasa lalap man banta. Ola aru ate, sebab IA enggo ngaturken perdalanen kegeluhenta sada persada.